

JDT lakar sejarah baharu

Sultan Johor rasmi stadium RM200 juta

Oleh Rizar Mohd Noor
rizar@mediaprima.com.my

Iskandar Puteri: Sultan Johor, Sultan Ibrahim Sultan Iskandar berkenan merasmikan stadium baharu Kelab Bolasepak Johor Darul Ta'zim (JDT), Stadium Sultan Ibrahim, di sini malam tadi.

Perasmian itu bermakna JDT akan menggunakan stadium baharu untuk saingan Liga Malaysia (Liga M) musim ini bermula menentang Kedah pada aksi pembukaan tirai Liga Super dan merebut Piala Sultan Ahmad Shah, Jumaat ini.

Pemilik JDT, Tunku Ismail Sultan Ibrahim jelas teruja dengan pembukaan stadium baharu itu sekali gus melakar sejarah buat kelab yang ditransformasi sejak 2013 itu.

"Tujuh tahun terakhir ini cukup hebat di dalam mahupun di luar padang untuk JDT dan pembukaan Stadium Sultan Ibrahim menandakan satu lagi sejarah buat Harimau Selatan.

"Selaku sebuah kelab, JDT berkembang sejak dari detik transformasi pada 2013. Kini kami berjaya mengatasi norma biasa dalam bola sepak Malaysia sekali gus mencipta penanda aras baharu dan bakal menaikkan standard serta mencabar batasan di peringkat antarabangsa," kata Tunku Ismail.

Sepanjang pembinaan stadium bernilai RM200 juta sejak Januari 2016 itu, Tunku Ismail tonggak yang memainkan peranan penting dengan terbinanya stadium yang dianggap terancang di rantau Asia Tenggara itu.

Tunku Ismail sentiasa memantau pembinaan stadium berkenaan dan terbabit secara langsung apabila memastikan kedudukan stadium itu menerima cahaya matahari mencukupi bagi kebajikan pertumbuhan rumput.

Beliau juga memastikan kepimpinan cermin di keliling kawasan dalam stadium dirapatkan kedudukan kerusi penonton dengan padang selain meletakkan lampu LED berwarna merah, biru dan putih keliling luar stadium untuk pencahayaan.

Selain mampu memuatkan 40,000 penonton, stadium yang dibina di atas tanah berkeluasan 28 hektar itu adalah sebahagian da-

ripada Bandar Sukan JDT yang akan menempatkan beberapa fasiliti sukan.

Reka bentuk stadium yang diilhamkan daripada bentuk daun pisang itu turut dilengkapi kemudahan padang jenis 'zoysian' dan ia mencapai piawai yang ditetapkan Persekutuan Bolasepak Antarabangsa (FIFA) selain sistem pencahayaan moden dan sistem bunyi canggih.

Stadium Sultan Ibrahim

Lokasi: Iskandar Puteri, Johor

Gps Koordinasi: 1.4817046; 103.6169512

Pemilik: Tunku Mahkota, Ismail Sultan Ibrahim

Kapasiti: 35,000 Penonton
Saiz Padang: 105 Meter X 68 Meter

Jenis Padang: Zeon Zoysia

Papan Layar: Dua Led

Pembinaan Bermula: 27 Januari 2016

Kos Pembinaan: RM 200 juta

Arkitek: Saadon Arkitek

Kontraktor: Forest City

Sub Kontrak: Country Garden Pacificview